

Sermimik imermillu avammut tunisassiornissamut 2026-mit 2030-mut periusissiaq

Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfimmit suliarineqartoq

Siulequt

Sermimik imermillu avammut tunisassiornissamut 2026-mit 2030-mut periusissiami Kalaallit Nunaata imermik, tassunga ilanngullugu imeq puiaasamiittoq, sermeq poornagu assartugaq kiisalu sersersuarmiit sermeq, avammut tunisassiornissaa isiginiarneqarpoq.

Periusissiamik suliaqarnermi 2017-imi periusissiami suliniutigineqartut nutarterneqarlutillu ingerlateqqinneqarput, taannalu sumiiffimmi aallarnisaasut suliffeqarfille Kalaallit Nunaata ernganik sermianillu iluanaarniutigalugu tunisassiorniartunut tunngaviumik sinaakkutigineqassaaq.

Periusissamik nutaamik suliaqarnikkut Naalakkersuisut kissaatigaat erngup iluani suliaqartut ineriartornissaannut sinaakkutiniq periarfissanillu ataqatigiinnerulersitsineq pitsaanerulersitsinerlu, taamaaliornikkut Kalaallit Nunaata ernga sermialu pitsaaneruumik atorineqarsinnaassaaq kiisalu sermeq, sermimiillu imeq imermillu avammut tunisassiarinissaanut sinaakkutit qulakkeerneqassallutik.

Aallaqqaasiut

2017-imiillu Naalakkersuisunit kissaatigineqarsimavoq erngup iluani inuussutissarsiorneq niuernikkut iluaqutigineratigut aammalu avammut imermik sermimillu tunisassiornikkut siuarsarneqassasoq. Taamani Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisuusup 2017-imi *Sermimik imermillu avammut tunisassiornissamut periusissiaq* suliarisimavaa, Inatsisartullu inatsit nr. 11, Sermip erngullu niuernikkut iluaqutigineqarnissaat pillugu Inatsisartut inatsisaat atuutilersillugu.

Ajoraluartumilli oqaatigineqartariaqarpoq neriutaasut malillugit erngup iluani inuussutissarsiorneq ineriartorsimanngitsaq, naak nunarsuarmi imermik puiaasamiittumik imermillu poornagu assartukkamiittumik pissarserusunneq annertusiartuinnavikkaluartoq.

Naalakkersuisut kissaatigaat erngup iluani inuussutissarsiorneq nunarsuarmi imermik pissarserusunnermut naammassinnittumik suleqataasinnaalissasoq.

Sermip erngullu avammut tunisassiornissaanut 2025-mit 2030-mut periusissiami pingaarnertut pingasut sammineqarput:

- 1) Inatsimmi aqqissuineq pitsanngorsaanerlu,
- 2) Akuersissutini tunniussisarnermut atatillugu sulianik suliaqarnermi pitsanngorsaaneq
- 3) Suliassaqarfiup iluani aningaasaliisinnaasunik aallarnisaasunillu soqutiginnilersitsinnaasunik sinaakkutini soqutigisanillu pilersitsineq.

Sermimik imermillu pissarserusussuttip annertusinera

Kalaallit Nunaanniippoq pisuussut immikkuullarissaq, taannalu tassaavoq sermimit imeq aammalu sermeq, taassumalu pitsaassusaa qaffasissorujussuuvog avammullu tunisassiarinnissaanut periarfissanik immikkuullarilluinnartunik peqarluni. Pitsaassuseq qaffasissaq, oqaluttuassaq immikkuullarissaq kiisalu angallassinermut aningaasartuutit qaffasinneri peqqutaallutik Premiumimik pitsaassusilinnik tunisassiornissap anguniarneqarnissaa pingaaruteqarpoq.

Aammattaq imermik pisariaqartitsisoqaleraluttuinarpoq, taamaalluni sinaakkusiinikkut imermik poorneqanngitsumik avammut tunisassiorneq pitsanngorsaaffigineqassaaq.

Tamannalu aqutugalugu akuersissutini pigisallit peqqinnartumik aningaasaqarnikkut suliffeqarfimmillu piujuartitsinermik tunngavilimmik ingerlatsisoqalersinnaanissaa anguneqarsinnaavoq, taamaalluni inuussutissarsiuteqarfimmi patajaatsumik aallartittoqarsinnaavoq. Uani aallartinneqarlu iluatsittumik niuerfik pilersinneqassaaq, taamaasilluni nunarsuarmi niuerfimmi piserusussuseq annertusarneqassalluni tamannalu pisinnaavoq "Brand Value" atorlugu naleqalersitsinikkut.

Piffissaq ungasinnerusog isigalugu umiarsuit tankitallit atorlugit imermik poortorneqanngitsumik tunisassiorsinnaaneq aamma periarfissaassaaq. Taamaaliortoqassappat sumiiffinni imermik annertuumik tankerinnissamut imaarsaanissamullu periarfissanik pilersitsisoqartariaqarpoq, taamaaliornikkut angallassineq aningaasaliinerlu aningaasaqarnikkut iluanaarutaasinnaalissaaq.

Tunisassiorfinnik sanaartukkanillu allanik suliaqarneq akuersissummik piginnittut ataasiakkaat akisusaaffigissavaat.

Sermiminngaanniit imeq immikkuullarilluinnartumik ataqatigiissagaavoq, mamaa annikitsuaraavoq kalkeqanngiivillunilu.

Sermimit imeq ukiorpassuarni pilersinneqarsimavoq, allaat ilaatigut ukiut 10.000 sinnerlugit ataallugilluunniit pisoqaassuseqarluni naqitaallunilu.

Tamannalu peqqutaalluni sermeq immikkuullarilluinnartumik imissallugu periuseqarpoq, arriitsumik aatsitaavoq amerlasuutigullu silaannaqarpoq nipilimmillu piiartarlutik. Sermeq katannerup kingorna kangerlunni katersuuttarpoq, taannalu poortorneqanngitsumik avammut tunisassiassatut assartorneqarsinnaalissaaq, kipparissukkaarlugi aggoriarlugi nunarsuarmi imerniartarfinni sermitut atorneqarsinnaavoq imaluunniit sequtseriarlugi puunut tunisassiassatut poortoriarlugi assartorneqarsinnaalluni.

Imerk tunisassiorneq:

2020-mit 2024-mut nunarsuarmi periutsit:

- 2020-mit 2024-mut avammut imermik tunisassiorneq annertusiartuaarpoq, ingammik imeq puiaasaniittut pineqarusunneri peqqutaallutik.
 - Europa, ingammik Frankrig, Italia Schweizilu imernik puiaasaniittunik avammut tunisassiornermi siuttuusimapput.
 - Island sermimit imermik annertuumik USA-mut tunisassiorsimavoq.
 - Aammattaaq Asiamut, Kangiata Qeqqanut ingammik Kinamut avammut tunisassiorneq annertusiartorpoq, taakkualu imermik premiumimik pitsaassusilimmik perusunnerat annertusiartorpoq.
- Imermittaqq annertuumik perusussuseq annertusiartorpoq.

Sermimik avammut tunisassiorneq:

Sermimik avammut tunisineq piffissami nutaajunerusumi siullermik 2024-mi pivoq, tassani sermeq Kangiata qeqqanut nassiunneqarpoq.

Ukiup nutaanngornerani 2024/2025 suliffeqarfiit imermik sermimullu akuersissutillit / tunisassiorsinnaanermut akuersissutillit tamakkerlutik 6 -iupput. 2025-p ingerlanerani qinnuteqaatinik arlalinnik pissarsisoqarnikuuvoq.

Pissutsit atugaasut:

Kalaallit Nunaanni imeqarpoq immikkuullarissumik, Naalakkersuisullu isumaat malillugu sermimik imermillu avammut tunisassiornermi niuernermi iluanaaruteqartoqarsinnaagalarpoq, atorneqanngitsumilli.

Sermimik imermillu tunisassiorneq nunarsuarmioqatitsinnut sanillersuussinnaasoq ersarissarneqassappat, pingaaruteqarpoq ussasaarinerup branderinerullu nukittunerulersinneqarnissaa, taamaaliornikkut ingerlatallit amerlanerusut periarfissamut soqutiginninnerulissapput tunisassiorusulerlutillu aammalu avammut tunisassiorsinnaalissallutik.

Sermimut imermullu avammut tunisassiorneq pillugu periusissiami siullermi 2017-imi akuerineqartumi misilittakkat takutippaat tunisassiornermik aallartitsiniarneq pisariusoq aningaasartornartorlu. Taassumalu saniatigut aamma angallassinermut aningaasartuuteqartoqartarpoq, tunisanillu isertitat annikillutik, taassumalu saniatigut coronavirusip nalaani pisut peqqutaallutik periarfissat ajoqusersimallutik.

Ingerlatsinissamut pilersaarut

Inatsisitigut aqqiinnikkut, sulianik ingerlataqarnermi periuttip pitsanngorsarneratigut aammalu qinnuteqarnissamut ilitersuutit paasiuminarsarneritigut Naalakkersuisut kissaatigaat kalaallit imiannik sermiannillu inuussutissarsiornerup iluani pitsaanerpaanik sinaakkusiortoqarsinnaasoq, taamaaliornikkut inuiaqatigiinni aningaasatigut ineriartorneq, suliffissat piujuartitsinermillu ineriartortitsineq pilersinneqarsinnaasoq.

“Imermut sermimullu suliniutit” nutaat ilagaat sermimik imermillu niuernermi iluanaarutaasussaasumik inatsisissamik nutamik suliaqarneq, taamaaliornikkut akuersissusiorderit tunngatillugit suliamik ingerlatsineq paasinanerulerlunilu ersarissaanerulissaaq. Naatsorsuutigaaq inatsit Inatsisartuni 2025 suliarineqassasoq. Taassuma saniatigut qinnuteqarnermi suleriuseq aqqissuunneqarlunilu pitsanngorsarneqassaaq, aammalu royaltymut aqqissuussineq nutaaq eqqunneqassaaq, taassumalu siunertaa tassaavoq avammut tunisassiornerup siuarsarneqarnissaa,

minnerunngitsumik imermut poortorneqanngitsumut. Naggataatigullu branding isiginiarneqassaaq, taassumalu pisuussutitta ilisimaneqarnerulernissaa anguniassavaa pitsaaquterpassuulu ersarissarneqassallutik.

Sermimut imermullu periusissiaq 2025-mit 2030-mut-mi ingerlatsinissamut pilersaarutit aalajangersimasut saqqummiunneqarput, taakkualu siunertaraat suliaasaqarfiup iluani suliniutit aaqqiissutissallu suunersut takutinneqarnissaat.

Anguniakkat suliaqarfissallu

Erngup sermillu iluani suliaasaqarfiit ineriartortinneqarnissaannut aammalu niuernerup iluani iluanaarfiusumik aningaasaqarnikkullu puijuartitsinermik tunngaveqarluni avammut tunisassiorneq iluatsinneqarnissaa anguniagaavoq.

Suliaasaqarfiillu ukua iliuuseqarfigineqarnissaat pisariaqarpoq:

- 1) Akuersissutiniq tunniussisarneq pillugu inatsisini, royaltynut aaqqissuussamik nutaamik, paasissutissani sulianillu ingerlatsinermi pitsanngorsaaneq
- 2) Ussassaarineq branderinerlu
- 3) Attaveqaasersuinermi aaqqiissutit nalinginnaasut
- 4) Suliaasaqarfiup iluani ilisimatusarneq ineriartortitsinerlu aammattaaq ilisimasaniq avitseqatigiinneq

Sermimik imermillu 2026-mit 2030-mut avammut tunisassiorneq pillugu periusissiaq iluatsissappat suliaasaqarfiit sisamaasut tunaartaassapput.

1) Akuersissutiniq tunniussisarneq pillugu inatsisini, paasissutissani sulianillu ingerlatsinermi pitsanngorsaaneq:

Inatsisini pitsanngorsaaneq

- 2025-mi ukiup affaani siullermi inatsimmi atuuttumi pitsanngorsagassanik suussusersiniarneq aallartisarneqarlunilu naammassineqassaaq, uanilu eqaannerusumik inuussutissarsiorpalaartumik aaqqissuunnissaa isiginiarneqassaaq.
- 2025-mi ukiup affaani siullermi inatsit nutaaq suliarineqassaaq, ilaatigut Royalty-mik aaqqissuussinermik atuutilersitsineq ilanngunneqassalluni.
- Inatsit nutaaq aaqqissuussaq Inatsisartut 2025-mi ukiaanerani ataatsimiilerpata saqqummiunneqassaaq.

Suliamik ingerlatsinermi pitsanngorsaaneq

- Qinnuteqarnermi pisariillisaanissaq pitsanngorsaanissarluni anguniarlugu qinnuteqariaaseq misissorneqassaaq. Suliaq aallaavigalugu suliamik ingerlatsinissamut ilitsersuusiortoqassaaq nutaamik. Periutsit inatsimmik nutaamik pisariaqartitsisuunngitsut 2025-mi ukiup affaani siullermi atuutilersinneqassapput. Ilitsersuut tamakkiisoq aatsaat Inatsisartut inatsisissatut siunnersuummik suliaqareerpata naammassineqarsinnaavoq, taannalu naatsorsuussaavoq 2025 naappat pisinnaassasoq.

2) Ussassaarineq branderinerlu:

Sermip piginnaasaa immikkuullarissaq pillugu ussassaarineq pitsaanerusoq

- Branderinissamut meqqilersuinissamullu periusissiamik suliaqartoqassaaq, tassanilu pitsaassutsip, suleriutsit oqaluttuallu eqqortup oqaluttuarineqarnissaa qulakkeerneqassaaq. Suliniut sumiiffimmi ussassaarusiortartut peqatigalugit 2025-p ingerlanerani aallartisarneqassaaq. 2025/26-p ingerlanerani meqqilersuinissamut aaqqissuussaq nutaaq aallartisarneqassaaq.
- Oqaluttuaq una pilersinniarneqartoq nunatta pitsaanerpaanik piujuartitsinermik tunngaveqartunik tunisassiortarnerannik anguniagaqarnermut naleqquttuuvoq, aammalu pinngortitaq kulturilu kusanarluinnartoq oqaluttuarineqassalluni. Brandingimi suliniutigineqartut iluatsissappata pisortaqaarfiit suleqataanissaat pingaaruteqarpoq, taamaaliornikkut imermut sermimullu niuerfimmi unammillernermik tunngaveqartuusumi angisuumi nukittuumilu tunisassiat kivinnejarsinnaalissapput.
- 2025 naatinnagu inuussutissarsiutillit naapinnerini aammalu nunat tamalaat akornanni messernerni peqataanermi iluaqutit periarfissallu misissorneqassapput nalilersorneqarsimassallutillu. Nukissiorneq minguitsoq silaannaallu pissusaanut mianerinittuq ass. aallaavigalugit piujuartitsinermik tunngaveqartoqassaaq. Nassuiaammik nutaamik atorneqarsinnaasumillu ussassaarinnermi atorneqarsinnaasumik suliaqartoqassaaq.
- Pitsaassuseq suminngaanneernerlu aallaavigalugit allagartalersuinissamut aaqqissuussinermik atuutilersitsisoqassaaq.
- Kalaallit Nunaanni imeqarnerup iluani suliffeqarfimmik isiginninniartumik aallartitaqarfinnut suleqatiginninneq inerisarneqassaaq. Imeqarnerup iluani suliaasaqarfiup aammalu B2B aallaavigalugu attaveqaateqalernissamut oqaloqatiginninnerit inuussutissarsiutillit 2025-2026 naapisinneqarnerini aallartisarneqassapput.

3) Attaveqaasersuinnermi aaqqiissutit nalinginnaasut

Attaveqaasersuinnermi pitsanngorsaaneq

- Sermimik imermillu avammut tunisassiornermi amerikami niuerfinnut attaveqaasersuutit pitsaanerusut aammalu containerinik angallassinnaanermut periarfissat pitsaanerusut iluaqutigilluarsinnaavai. Taamaaliornikkut tunisassiortut angallassineq akisooq Islandikkoortoq Danmarkikkoortorluunniit avaqqullugu pisariinnerusumik assartuisinnaalissagaluapput.

4) Ilisimatusarneq ineriartornerlu:

Ilisimatusarnerup ineriartornerullu iluani pitsanngorsaaneq

- Inuussutissarsiummik ingerlatsisut, naalakkersuisoqarfik pisisartuusinnaasullu peqatigalugit tunisassiap Premiumitut / High Enditut ineriartortinneqarsinnaanissaanut periarfissat suunersut misissorneqassapput. 2025-mi ukiakkut saqqummiunneqassaaq.
- Erngup iluani suliaasaqarfimmi attaveqaqatigiinnik naapertuuttunik pilersitsinikkut ilisimasanik avitseqatigiinneq, tassani inuussutissarsiutillit soqutigisallillu misilittakkaminnik ilisimasaminnillu avitseqatigiissinnaassapput.

Sermimik imermillu avammut tunisassiornerup FN-imilu

nunarsuarmi anguniakkat ataqatigiissusaat

Sermimik imermillu avammut tunisassiornissamut 2025-mit 2030-mut periusissiamik suliaqarnermi FN-imi nunarsuarmi anguniakkat, taakkunungalu attuumassusillit tulluuttut aallaavigneqarsimapput:

Nunarsuarmi anguniagaq 6: Imeq minguitsoq errororfissarlu – ilanngullugit imm. 6.4, 6.5 aamma 6a

Nunarsuarmi anguniagaq 8: Aningaasaqarnikkut ineriartorneq suliffiillu pitsaasut – ilanngullugit imm.8.3 aamma 8.4

Nunarsuarmi anguniagaq 9: Nutaaliorneq attaveqaasersuinerlu – ilanngullugit imm.9.1 aamma 9.2

Nunarsuarmi anguniagaq 12: Akisussaassuseqartumik atuineq tunisassiornerlu – ilanngullugu imm.12.2

Nunarsuarmi anguniagaq 17: Iliuuseqarnissamut suleqatigiinneq – ilanngullugit imm.17.16 aamma 17.17

Imerk pilersuinissamut qulakkeerinninneq piujuartitsinermillu tunngaveqartumik ingerlatsineq (Nunarsuarmi anguniagaq 6)

Nunarsuarmi innuttaasut affangajaasa imermik amigaateqarneq malugaat. Kisitsisit tupannaannartumik annertupput, silaannaallu pissusaata allanngoriartornerata malitsigisaanik nunarsuarmi kissassutsip annertusiartornera ilutigalugu amigaateqarneq annertusiartussangatinneqarpoq.

2050-mi naatsorsuutigineqarpoq nunarsuarmi innuttaasut 47 procentii imermik ernummateqarfimmi najugaqassasut; sumiiffiillu ilaanni ataavartumik imeqarfiit nungunneqalereerput taamaattumik imeqarfiit nalinginnaasuunngitsut naatsorsuutigililiivppaat. Panernersuaq inoqajuitsullu amerliartornerini isiginiassagaanni pissutsit atuuttut takuneqarsinnaalereerput.

2050-mi naatsorsuutigineqarpoq nunarsuarmi nunat sisamaraarterutaat uteqqiattumik imermik amigaateqalersimassasut.

2030 tikitsinnagu nunarsuarmiut, nunarsuarmi pissutsit atuuttut aallaavigalugit, imermik isumannaatsumik akikitsumillu pissarsisinnaanissaat anguniassagaanni, attaveqaasersuutitut aningaasaliisoqartariaqarpoq.

Imerk amigaateqalernissaq pinngitsoortissagaanni uumasut imermit aallaavillit illersorneqarnissaat pilersinneqaqqinnissaallu pingaaruteqarpoq. Nunat panernersuaqarfiusut inuilaanillu pilersitsiortorfiusut tapersorneqassappata imeqarfiillu pitsanngorsarneqassappata nunat tamalaat akornanni suleqatigiittoqartariaqarpoq.

FN-imi anguniagaq naleqquttoq:

2030 tikitsinnagu suliaasaqarfinni assigiinngitsuni imermik atuineq pitsanngorsarneqassaaq, aammalu imermik amigaateqarneq iliuseqarfiginiarlugu inuillu ikinnerusunut imermik amigaateqarnissaa anguniarlugu imermik tigooraaneq pilersuinerlu piujuartitsinermik tunngaveqartumik ingerlanneqarnissaa qulakkeerneqassaaq.

2030 tikitsinnagu imermik pisuussutsip ingerlanneqarfia assigiinngitsunut ilanngunneqarsimassaaq, tassunga ilanngullugu nunap killiisa avataaniittunik suleqateqarneq.

2030 tikitsinnagu nunat tamalaat akornanni suleqatigiinnerisigut nunani ineriartortuni erngup, errororfissat pigineqarsinnaasut annertusarneqarnissaannut suliniutitut peqataalertoqassaaq, tassunga ilanngullugu imermik katersinermi, tarajuaanermi, imermik kaaviiartitsinermi, imermik errororfikumik suliaqarnermi, atoqqiinermi, atoqqiinerullu iluani teknologijt. (Nunarsuarmi anguniagaq 6, Imm. 6.4, 6.5 aamma 6a)

Piujuartitsinermik tunngaveqartumik ineriartorneq tamakkiisumillu suliffissaqartitsineq (Nunarsuarmi anguniagaq 8)

Piujuartitsinermik tunngaveqartumik ineriartorneq pillugu nunarsuarmi anguniakkani tunisassiornerunikkut teknologimilu periutisnik nassaarnikkut aningaasaqarnermi ineriartornissaq siuarsarniarneqarpoq. Politikkit aallarnisaasunut suliffissanillu pilersitsisartunut iluaqutaasut suliarinerisigut aningaasaqarnikkut ineriartorneruneq pillugu anguniakkat anguneqassapput.

FN-imi anguniagaq naleqquttoq:

Nunarsuarmi anguniarneqarpoq tamakkiisumik suliffissaqartitsineq aammalu arnanut angutinullu suliffissat naapertuuttut atorlugit qaffasissumik tunisassiorneq.

Atuinerup tunisassiornerullu iluani 2030-p tungaanut nunarsuarmi pisuussutiniq atuneq ingerlaavartumik pitsanngorsaaffigineqassaaq, aammalu aningaasatigut ineriartornerit avatangiisinut ajornerulersitsinnginnissaat anguniarneqassaaq, taakkualu nunat ineriartortut siuttuliullugit piujuartitsinerup iluani atuineri pilersuinermilu periutsit malillugit ukiunut 10-nut sinaakkutissatut suliniutaasut aallaavigissavaat. (Nunarsuarmi anguniagaq 8, imm. 8.3 aamma 8.4)

Attaveqaasersuutit patajaatsut nutaaliornermillu tapersersuineq (Nunarsuarmi anguniagaq 9)

Attaveqaasersuineri, teknologiini nutaaliornernilu piujuartitsinermik tunngaveqartunik ingerlaavartumik aningaasaliineq aningaasaqarnermi ineriartornissamut pingaaruteqarput.

Teknologimik ineriartornerup iluani ataavartumik aningaasaqarnerup iluani aammalu avatangiisini unammilligassat iluani piujuartitsinermik tunngavilinnik aaqqiissutiniq nassaarnissaq pingaaruteqarpoq, assersuutigalugu suliffissanik nutaanik pilersitsineq, suliffissuaqarfiit avatangiisinut mianerinnittunik siuarsaaneq aammalu ilisimatusarnermut nutaaliornermullu aningaasaliineq.

FN-imi anguniagaq naleqquttoq:

Suliffissuaqarneq peqataatitsisoq piujuartitsinermillu tunngavilik inerisarneqassaaq, aammalu 2030 tikitsinnagu nunamut naleqquttumik suliffissuaqarnerup iluani suliffissat aammalu naalagaaffimmi tunisat ataatsimut naleqalersimassapput. Nunani ineriartorfiunnginnerpaami suliffissuaqarfiit niuernerimi annertussusaat marloriaatinngortinneqassapput (Nunarsuarmi anguniagaq 9, imm. 9.1 aamma 9.2)

Piujuartitsinermik tunngaveqartumik atuneq tunisassiornerlu (Nunarsuarmi anguniagaq 12)

Aningaasaqarnermi ineriartorneq piujuartitsinermik tunngaveqassappat nunarsuarmi nioqqutissat pisuussutsillu tunisassiarineqartarneri atorneqartarnerilu allatut suliarineqartariaqarput.

Nunarsuaq ataatsimut isigissagaanni nunalerineq imermik atuiffiunerpaavoq. Imerterineri erngup tamakkiisumik 70 procentia atorneqartarpoq.

FN-imi anguniagaq naleqquttoq:

2030 tikitsinnagu pinngortitami pisuussutsit piujuartitsinermik tunngaveqartumik ingerlatsiviussapput atorneqassallutillu (Nunarsuarmi anguniagaq 12, imm. 12.2)

Nunarsuarmi suleqatigisassat piujuartitsinermillu tunngaveqartumik ineriartorneq (Nunarsuarmi anguniagaq 17)

Piujuartitsinermik tunngaveqartumik ineriartornissaq pillugu nunarsuarmi anguniakkat taamaallaat piviusunngortinneqarsinnaapput nunarsuarmi suliniutinut aallussinikkut suleqatigiinnikkullu. Ullutsinni nunarsuaq qaninneerarsuanngornikuuvoq. Teknologi ilisimasallu pitsaanerusut pisariinnerusullu pissarsiarineqarsinnaalerneratigut isumassarsiat siammarterneqarsinnaalernikuupput nutaaliernerillu siuarsarneqarsinnaalerlutik.

FN-imi anguniakkat naleqquttut:

Nunarsuarmi anguniakkat angunissaannut nunap iluani pilersaarutit aqqutigalugit avannaata-kujataata aammalu kujataata-kujataatalu akornanni suleqatigiinnerit annertusarneqarnissaat anguniagaavoq. Assigiimmik, inatsisinik aallaavilinnik niuerneramilu naapertuuttumik, ammasumik tamanullu iluaqutaasussamik angusaqassagaanni nunat tamalaat akornanni niueqatigiinneq avammullu tunisassiornerunissamut tapersersuisoqartariaqarpoq.

Piujuartitsinermik tunngaveqartumik ineriartortoqarnissaa pillugu nunarsuarmi anguniakkat angunissaanni nunat tamarmik tapersersorneqartariaqarput. Tamannalu assigiinngitsunik soqutigisallit akornanni suleqatigiinnikkut anguneqartariaqarpoq, tassanilu ilisimasat, piginnaasat, teknologi aningaasaqarnermilu pisuussutit suussusersineqartariaqarput avitseqatigiissutigineqartariaqarlutillu.

Suleqatigineqarsinnaasut assigiinngitsut, soorlu pisorta qarfiit, pisorta qarfinnit namminersortitat aammalu inuiaqatigiinni suliffeqarfiit suleqatiginiarneqassapput siuarsarneqassallutillu.

Tunuliaqut

Sermimik imermillu avammut tunisassiornissamut 2025-2030 nalaanni periusissiamik suliaqarnermi paasissutissat tulluuttut tunuliaqutarineqarput:

Nunatta sermimit imermik sermimillu avammut tunisassiorneranit niuernermit kisitsit.

Qinnuteqartut pisinnaatitsissummillu pigisallit ingerlaavartumik oqaloqatigineri.

Inatsisit atuuttut misissorneqarneri aammalu sulianik ingerlatseriaatsip atuuttup nalilersorneqarnera.